

四庫全書

史部

欽定四庫全書

史部

欽定皇輿西域圖志卷二十三
四

詳校官通政使臣夢吉

檢討臣德生覆勘

總校官候補中允臣王燕緒

校對官中書臣吳樹萱

謄錄監生臣褚兆麟

欽定四庫全書

欽定皇輿西域圖志卷二十三目錄

山四

天山南路

金嶺

都魯達巴

蘇巴什塔克

納林奇喇塔克

博羅圖塔克

楚輝塔克

海都塔克

庫木什阿克瑪塔克

額格爾齊塔克

沙山

庫隴勒塔克

達蘭達巴

拜拉克塔克

烏什噶克塔克

哈喇庫爾達巴

愛呼木什塔克

庫克納克達巴

布里博克濟塔克

鄂克阿特庫塔克

却爾噶塔克

圖格哈納達巴

哈喇裕勒袞塔克

額爾齊斯哈喇塔克

松塔什塔克

固勒扎巴什達巴

赫色勒額什墨塔克

英額齊盤塔克

密爾岱塔克

庫克雅爾塔克

貝拉搭克

奇勒揚塔克

和什塔克

薩納珠塔克

堅珠塔克

哈朗歸塔克

瑪雜爾塔克

葱嶺

和什庫珠克達巴

烏魯阿喇特達巴

汗特勒克塔克

克伯訥克達巴

齊齊克里克達巴

特勒克達巴

杭阿喇特達巴

沙圖圖達巴

碩勒圖郭勒塔克

碩什達爾烏蘭達布遜塔克

欽定皇輿西域圖志卷二十三目錄

欽定四庫全書

欽定皇輿西域圖志卷二十三

山四

天山南路

金嶺

金嶺在闐展北境嶺脈係天山分支自迪化州東境之托克喇鄂拉東出為都魯達巴經土爾番城北東至闐展四百餘里凡闐展所屬諸城皆以此

山為屏障亦皆藉此山之水導之繞城以溉田園

隋書高昌傳

北有赤石山山北七十里有貪汙山

夏有積雪

唐書地理志

西州交河郡開元中曰金山都督府

宋史外國傳有水源出金嶺導之周圍國城以溉

田園作水磴

宋王延德高昌行紀

歷交河州凡六日至金嶺口

寶貨所出又兩日至漢家砦又五日上金嶺嶺上

有龍堂刻石記云小雪山也嶺上有積雪行人皆服毛罽度嶺一日至北廷

按漢書西域傳卑陸國治天山東乾當國

劉奉世曰

下國字當作谷

卑陸後國治番渠類谷郁立師國治內

吐谷西且彌國治天山東于大谷東且彌國治天山東允虛谷劫國治天山東丹渠谷狐胡國治車師柳谷考諸國舊疆即今開展所屬之蘇巴什森尼木汗和羅諸境居金嶺之北者則所

謂乾當番渠類內吐于大允虛丹渠柳谷應即
今金嶺以北博克達鄂拉東南一帶山谷而乾
當于大允虛丹渠云在天山東當與博克達鄂
拉為尤近唐書薛延陀傳載契苾哥楞為易勿
真莫賀可汗據貪汗山以隋書赤石山北七十

里有貪汗

汗為汗
字之訛

山之文証之則貪汗山當即今

之博克達鄂拉

詳見卷
二十一

而其南七十里之赤石

山當即唐地理志所謂金山宋史所謂金嶺其

名至今不易者但考唐書稱自交河縣北八十里
有龍泉館又北入谷百三十里經柳谷度金沙
嶺則自縣北二百一十里至金沙嶺也延德
行紀稱自交河州六日至金嶺口又兩日至漢
家砦又五日上金嶺則自交河城十三日行至
金嶺也疑當時自都魯達巴至托克喇鄂拉一
帶總名金嶺今則專屬闢展諸城之北山矣

都魯達巴



都魯達巴在交河城西北一百二十里其脈從迪化州東之托克喇鄂拉分支迤邐而東屬於金嶺東西百里西有圓澤周數里名鄂蘭淖爾其支流出於嶺谷間乃雅木什以西諸城屏障也

按宋王延德高昌行紀歷交河州凡六日至今嶺口又兩日至漢家砦以今形勢証之都魯達巴與漢家砦為近

蘇巴什塔克

蘇巴什塔克在闐展南自博羅圖納林奇喇諸塔
克迤邐東屬經闐展南境踰東界而止為闐展南
屏過此而東南皆沙磧矣其北谷口在托克三西
南五十里谷內有兩大石入谷行十里微有水草
蓋古車師通焉耆道也

唐書地理志自西州西南有南平安昌兩城百二
十里至天山西南入谷經礪石磧

按唐西州今為闐展蘇巴什塔克在闐展西南

一百七十里唐地理志稱西州西南入谷者當指蘇巴什山谷而言谷內兩大石意即所謂礪石也又按自托克三西出有三道其一出伊拉里克由阿拉癸鄂拉入谷口經裕勒都斯以抵伊犁其一經納林奇喇山口踰博羅圖谷口迤南以抵楚輝其一西南入蘇巴什谷口踰庫木什阿克瑪塔克亦抵楚輝

納林奇喇塔克

納林奇喇塔克在蘇巴什塔克西五十里其東谷口在托克三西南九十里山峯最高處為額爾坤達巴自谷口迤西南峭崿如屏

博羅圖塔克

博羅圖塔克在納林奇喇塔克西五十里當哈喇沙爾東北境山多積雪博羅圖郭勒發源北麓乾隆二十六年遣官告祭每歲春秋致祀入北谷口西行通裕勒都斯出西南谷口西南行即哈喇沙

爾境

告祭博羅塔克文

維神體結坤輿靈昭允位連峰峻峙拔萬仞以倚天積
雪高攢歷四時而浮玉作花門之巨鎮永奠西遐界蔥
嶺以中維遙通南道朕統臨縣寓式廓輿圖異域歸仁列
嶂暨于闐之外殊方在宥興屯踰烏壘而遙乃諸部之
往來仰崇山之綿亘雖幽遐不閉久已荷乎

天休而梯棧無虞實更資乎神應用申秩祀練時日以薦

馨敬遣專官肇履縣而展告自此途開九折共遵王路
之蕩平亦惟寒斂六花長被春風之和煦丕彰肝鬲來
鑒苾芬乾隆二十六年月日

歲祭博羅圍塔克

維神鍾靈遐域正宅西陲險關巖叢導我武維揚之路
高踰龍阜界殊方內屬之區作巨鎮於回中峰層嶂疊
通輿區于域外棧接梯連實唯名山允宜嘉秩朕八荒
在闡六合為家既耆定乎準夷遂全收乎回部興屯更

戍宜安枕席以過師駐牧游羣當順涼暄而應候惟神
庥之是賴仰靈貺之攸昭爰伸圭幣之儀登諸祀典更
肅春秋之祭載在秩宗並協柔懷宜彰肝鬲長此冰消
寒玉調燭被于光天行當雷浹春膏湛恩漸於絕徼茲
芬式薦歆格斯誠

按博羅圖塔克與阿勒鄂拉南北相接形
如鎖鑰西通準部南界回疆闢展西南境一大
關隘也

楚輝塔克

楚輝塔克在哈喇沙爾城北十里阿拉癸鄂拉分支也奇爾歸圖郭勒發源南麓南流至楚輝城東資以灌田

後漢書西域傳焉耆國四面有大山

按今哈喇沙爾古焉耆國楚輝塔克當其北是為古焉耆國之北山至周隋二書所謂焉耆國在白山南七十里者指天山正幹而言又當在

楚輝塔克北以今之孟克圖達巴當之方位適

合

海都塔克

海都塔克在楚輝塔克西二百五十里哈布齊垓
南哈喇沙爾北哈布齊垓郭勒裕勒都斯郭勒咸
會而南行出此山之口為海都郭勒山脈自西九
百里之汗騰格里鄂拉分支東南行至此為哈喇

沙爾北屏

水經注 焉耆之北敦薨之山在匈奴之西烏孫之

東

按哈喇沙爾為古焉耆海都塔克正當其北應
為古敦薨山也

庫木什阿克瑪塔克

庫木什阿克瑪塔克在蘇巴什塔克北谷口西南
一百四十里自蘇巴什北谷迤邐西南行十里漸
聞水聲遍谷皆淺水山勢漸狹兩崖壁立人行其

間如一線天又里許即沙灘又二十里有大石崎
嶇者二處車不能行為古車師國西境關隘又二
十里至艾噶爾布拉克又五十里出南谷口山脈
自蘇巴什塔克分支西南行至此

唐書西域傳焉耆國王龍突騎支不朝貢命安西
都護郭孝恪為西州道總管率兵出銀山道討之
地理志西州西南經磧石磧二百二十里至銀山

磧

按回語庫木什銀也阿克瑪積而不散之謂庫木什阿克瑪塔克即唐書所謂銀山磧也郭孝恪進討焉耆兵出銀山道亦即此地

額格爾齊塔克

額格爾齊塔克在庫木什阿克瑪塔克西南一百三十里自庫木什阿克瑪塔克東口西行四十里入南山之北口折而東南又迤邐西南行三十里出南口又轉而西行六十里至西山下玲瓏怪石

徧地葦草掘之得水自此西南行入於沙磧

〔晉書西戎傳〕焉耆國四面有大山道險隘百人守

之千人不過

〔唐書地理志〕銀山磧四十里至焉耆界呂光館又

經盤石

按今庫木什阿克瑪譯言銀山額格爾齊塔克
有奇石當庫木什阿克瑪西南境即唐書所云
盤石也呂光館雖不可考然總在額格爾齊塔

克東據唐書稱焉耆國橫六百里以今形勢考
之東自庫木什阿克瑪塔克西至庫隴勒係焉
耆全境則自當以銀山磧為東界而呂光舊館
即在其西可知

沙山

沙山在博斯騰淖爾南一百二十里為哈喇沙爾
之南屏山脈自額格爾齊塔克踰沙磧至此岡巒
亘互西接庫隴勒塔克

漢書西域傳

山國西至尉犁二百四十里西北至

焉耆百六十里西至危須二百六十里東南與鄯

善且末接山出鐵民山居寄田糴穀於焉耆危須

晉書西戎傳

沙州刺史楊宣疆理西域以部將張

植為前鋒所向風靡軍次焉耆

熙焉耆國王名

拒戰於

賁崙城為植所敗植進鐵屯門未至十餘里熙又

率眾先要之於遮留谷植將至或曰谷名遮留殆

將有伏單騎嘗之果有伏發植馳擊敗之進據尉

犁

按漢書山國民山居師古注云常在山下居不
不為城治也更以焉耆危須尉犁三國相距數
里考之焉耆為今哈喇沙爾危須為今察罕通
格尉犁為今哈勒噶阿瑞則此山國當在今沙
山之東麓山谷間所謂東南與鄯善且末接者
由沙山東南行入沙磧正當古且末鄯善國地
也至晉張植之伐焉耆由沙州西北行次其國

當在焉耆東南境今沙山居哈喇沙爾之南其
山東西相屬則所謂遮留谷者亦當在今沙山
東南麓由是西行而據尉犁總在焉耆南境若
賁崙城故址則不可考矣沙山以漢名相傳非
準回語云

庫隴勒塔克

庫隴勒塔克在哈喇沙爾西南一百八十里脈自
沙山西走百餘里至此勢極險峻古焉耆以西諸

國關隘也

唐書西域傳自馬耆西南步二百里度小山經大河二又步七百里至龜茲

按庫隴勒在漢為尉犁國地與額格爾齊塔克東西環抱所謂四面有山者也東距哈喇沙爾一百八十里唐書所謂二百里小山者指此又按自納林奇喇塔克至海都塔克為哈喇沙爾北境之山自庫木什阿克瑪塔克至庫隴勒塔

克為哈喇沙爾南境之山西境皆抵海都郭勒
達蘭達巴

達蘭達巴在海都郭勒西八十里哈勒噶阿瑞城
西北一百八十里山脈自汗騰格里鄂拉東南行
七百餘里至此東與海都塔克接

拜拉克塔克

拜拉克塔克在達蘭達巴西北三百里西裕勒都
斯支河發源北麓

烏什噶克塔克

烏什噶克塔克在拜拉克塔克西一百里西裕勒都斯支河發源北麓

哈喇庫爾達巴

哈喇庫爾達巴在烏什噶克塔克西南一百里鄂頗爾西玉古爾北巖崖高峻為天山支峰之傑出者第納爾郭勒伊蘭布拉克發源南麓

愛呼木什塔克

愛呼木什塔克在哈喇庫爾達巴西一百五十里

山形卑小亦天山支峯

庫克訥克達巴

庫克訥克達巴在愛呼木什塔克西五十里額什
克巴什郭勒發源南麓山脈自天山正幹之額什
克巴什鄂拉分支東行六十里至此

布里博克濟塔克

布里博克濟塔克在賽喇木城南木素爾郭勒南

岸自圖格哈納達巴至此山脈亦自西而東

鄂克阿特庫塔克

鄂克阿特庫塔克在布里博克濟塔克西拜城西
南木素爾郭勒南岸

却爾噶塔克

却爾噶塔克在鄂克阿特庫塔克西木素爾郭勒
西南又西與圖格哈納達巴接

圖格哈納達巴

圖格哈納達巴在木素爾郭勒西四十里山脈自天山正幹之薩瓦布齊鄂拉東南行二百里至此出白鹽色最瑩潔遠近資之

哈喇裕勒袞塔克

哈喇裕勒袞塔克在圖格哈納達巴西南四十五里亦小山也

唐書西域傳龜茲國西三百里度石磧

按此與圖格哈納南北相屬在庫車西三百里

外庫車為古龜茲則唐書所載龜茲國北三百里之石磧當與今哈喇裕勒衮塔克相近又按東自達蘭達巴至此峰巒層疊山北即裕勒都斯全境泉源迭發裕勒都斯郭勒在古為鷹娑川則此一帶山嶺應屬唐時鷹娑都督府之南屏也

額爾齊斯哈喇塔克

額爾齊斯哈喇塔克在烏什西色帕爾拜西南行

十里山形卑小當孔道由此喻天山而北為伯得
里克鄂拉又折而西通布魯特境

松塔什塔克

松塔什塔克在額爾齊斯哈喇塔克西南四十里
北當孔道因山名地亦稱松塔什

固勒扎巴什達巴

固勒扎巴什達巴在松塔什西南一百里為烏什
西南屏山脈自喀克沙勒鄂拉分支東南行經托

什千里達里雅南連山不斷至此嶺尤陡絕高數
百丈層峰插天東行為松塔什塔克額爾齊斯哈
喇塔克踰烏什而東四百餘里抵托什千達里雅
西境其脈始盡

按漢書尉頭國南與疏勒接山道不通尉頭為
今烏什疏勒為今喀什噶爾說見疆域今自烏
什西南之古勒扎巴什達巴東南行踰烏什而
東山脈始盡此山之南沙磧千里為古疏勒東

境即唐書所謂疏勒國環千里多沙磧少土壤者以此揆之則自烏什南山迤西至固勒扎巴什達巴更西南一帶之山正當漢時尉頭疏勒兩國間即漢書謂山道不通者今固勒扎巴什達巴以西山徑崎嶇艱於步陟形勢猶可想見

赫色勒額什墨塔克

赫色勒額什墨塔克在固勒扎巴什達巴西南三十五里

英額齊盤塔克

英額齊盤塔克在葉爾羌西南英額齊盤西十里
與裕勒阿里克塔克東西相望俱在葉爾羌諤斯
騰西境其南境為裕勒阿里克塔克

密爾岱塔克

密爾岱塔克舊音闐爾塔克在葉爾羌東南產玉
石由是東行接和闐南境諸山俱產玉

庫克雅爾塔克

庫克雅爾塔克在裕勒阿里克塔克東南庫克雅爾南聽雜阿布諤斯騰發源山中

貝拉塔克

貝拉塔克在庫克雅爾塔克東北貝拉南魯楚克

西南境

奇勒揚塔克

奇勒揚塔克在貝拉塔克南庫克雅爾塔克東庫

克雅爾奇勒揚兩塔克以南為痕都斯坦界

和什塔克

和什塔克在奇勒揚塔克東北葉什勒庫勒發源

東麓

薩納珠塔克

薩納珠塔克在薩納珠東南自英額齊盤塔克至

此東西綿亘為葉爾羌南境諸山皆由葱嶺分支

東南行六百餘里接和闐南境諸山

堅珠塔克

堅珠塔克在和闐西南境阜窪勒西南薩納珠塔
克東二百里

哈朗歸塔克

哈朗歸塔克舊音哈朗圭在和闐西南境阜窪勒
南又東南為額什墨提斯塔克皆屬和闐南境之
山亦自葱嶺分支過葉爾羌南境諸山又東行至
此和闐郭勒出其北麓

後漢書西域傳河有兩源一出于寘南山下

魏書西域傳蒲山國西南三里有凍凌山

唐西域記王城西南二十餘里有瞿室餒伽山

古北

牛角山峯兩起巖隙四絕牛角山巖有大石寶近者
崖陞掩塞門徑國王興兵欲除陞石即墨蜂羣飛
毒螫人衆以故至今石門不開

按今和闐南境之山為豎珠哈朗歸額什墨提
斯諸塔克即後漢書所謂于寘南山者也魏時
蒲山國為今皮什南皮雅勒阿勒瑪等處所謂

凍凌山者當在其西南境至唐西域記載有瞿
室餒伽山在王城西南二十餘里今和闐額里
齊城西南一百六十里地名皮什南城居山谷
皮什南與瞿室餒伽字音相近方位亦符兩峰
四絕之形勢猶有存者是唐西域記之瞿室餒
伽山當在今皮什南之南為堅珠哈朗歸額什
墨提斯諸塔克也漢書所謂河源出南山下者
於此可考

詳卷二十八水門

自和闐南山東南行峰嶺

連綿相屬於沙磧之區經五千餘里與安西南
路之南山接

瑪雜爾塔克

瑪雜爾塔克在和闐郭勒西三百里為和闐北屏
山不甚高產火硝不當孔道

魏書西域傳于闐地方千里連山相次

按自瑪爾占鄂勒氏西行至瑪雜爾塔克迤邐
而西連山不斷直抵葉羌謬斯騰當屬於闐北

界魏書所謂連山相次者以此

葱嶺

葱嶺一名極疑山在天山西南與南山會合處連岡疊嶂數百餘里起伏迤邐高者上薄霄漢為西域西境之屏障今喀什噶爾葉爾羌正西一帶諸山皆是也喀什噶爾葉爾羌兩河皆發源於此其間土名隨地而殊於古總謂之葱嶺

漢書西域傳西域三十六國西則限以葱嶺其河

有兩源一出葱嶺山又南道西踰葱嶺則出大月氏安息北道西踰葱嶺則出大宛康居奄蔡

水經注葱嶺高千里西河舊事曰葱嶺在敦煌西八千里其山高大上生葱故曰葱嶺也河源潛發其嶺分為二水

唐書西域傳葱嶺俗名極疑山環喝盤陀國開元中置葱嶺守捉安西極邊戍也

唐西域記葱嶺者據南瞻部洲中南接大雪山北

至熱海千泉西至活國東至烏鋤國東西南北各數千里崖嶺數百里幽谷險峻恒積冰雪寒風勁烈多出蔥故謂蔥嶺又以山崖蔥翠遂以名焉

按蔥嶺為西域名山之尤著者自魏書稱于闐在蔥嶺北後世遂指南山為蔥嶺今考漢書云西域南北有大山東則接漢阨以玉門陽關西則限以蔥嶺夫玉門陽關在西域正東而與蔥嶺對舉則蔥嶺在正西可知也又云河源一出

葱嶺山一出于闐于闐在南山下其河北流與
葱嶺河合東注蒲昌海夫曰南山明葱嶺之為
西山曰于闐河北流明葱嶺河之東流而葱嶺
之在西益可知也即以水道証之水經注河源
潛發其嶺分為二水今喀什噶爾葉爾羌兩河
正發源西山果分二水又隋西域圖記序云其
中道從高昌焉耆龜茲疏勒度葱嶺又經鑿汗
諸國達西海南道從鄯善于闐朱俱波啜盤陀

度葱嶺又經護密諸國達西海與漢書南北道俱踰葱嶺之說合是亦西山為葱嶺之明証一統志謂漢時指今土爾番西海杜河所出之山為葱嶺然考海杜河即海都郭勒在哈喇沙爾南與葉爾羌西之葱嶺無涉漢書亦本無此說又謂漢時于闐南山指今塔里母河所出之地亦有未盡深考者辨詳卷二十八葉爾羌謬斯騰條下

和什庫珠克達巴

和什庫珠克達巴舊音霍斯庫魯克在葱嶺中阿喇楚勒東一百里山場寬廣峰嶺殊峻乾隆二十四年參贊大臣毅勇公明瑞敗賊於此詳見卷十七疆域

唐書西域傳由疏勒西南入劍末谷不忍嶺

按今喀什噶爾為古疏勒西境由是西南行山徑相屬而和什庫珠克達巴尤稱超峻所謂劍

未谷不恐嶺者當於此為近

烏魯阿喇特達巴

烏魯阿喇特達巴在喀什噶爾西北境為葱嶺東北分支處由是東北行為天山正幹

汗特勒克塔克

汗特勒克塔克在英噶薩爾城西百餘里葱嶺東境分支也又有特勒克奇塔克齊特克塔克俱與汗特勒克塔克相屬其英噶薩爾城南之山曰烏

拉齊塔克曰裕魯塔克曰洮野柳塔克曰阿齊克
塔克西南二面山口皆通拔達克山路

克伯訥克達巴

克伯訥克達巴在喀什噶爾西境外一百里其東
五十里為哈喇塔克

齊齊克里克達巴

齊齊克里克達巴在哈喇塔克東一百里當孔道北
特勒克達巴

特勒克達巴在齊齊克里克達巴東一百里當孔道北

杭阿喇特達巴

杭阿喇特達巴在特勒克達巴東一百里當孔道北又東南行接葉爾羌南境諸山

按葱嶺周遭廣遠峰巒迴抱名難悉舉如和什庫珠克達巴以下其最著者山脈自拉藏以西之岡底斯山東北行綿亘至此其向東南分支

者即葉爾羌和闐南境諸山又東南行為沙圖
圖達巴地入沙磧

沙圖圖達巴

沙圖圖達巴在和闐東南自和闐東境之塔克村
東踰葉什勒淖爾又東行沙磧六百里至沙圖圖
達巴迤北岡巒相屬不絕

碩勒圖郭勒塔克

碩勒圖郭勒塔克在沙圖圖達巴東北三百餘里

沙磧中

碩什達爾烏蘭達布遜塔克

碩什達爾烏蘭達布遜塔克在碩勒圖郭勒塔克
東南二百五十里沙磧中

按自和闐東南行至此直北七百餘里至羅布
淖爾南境沙磧中山嶺綿亘其自東折而北者
亘千有餘里與安西府西南境之南山相屬

欽定皇輿西域圖志卷二十三

欽定四庫全書

欽定皇輿西域圖志卷二十四

水

臣等謹按大地之勢西北高而東南下東南號稱澤國若蒙汜荒墟斥漠千里宜不足于水者以今審論殊不謂然蓋內地之水東流就下而西域之水則東西並流者也內地之水隄防宣洩兼賴人功而西域之水則高下浮沈專憑地勢者也內地之

水深淺有定而西域之水則時因冰雪消融成渠
冬夏盈虧者也內地之水土地堅韌伏流鮮少而
西域之水則滲入沙磧或伏或現發之無常時出
之無常候者也是故語其大則洪濤駭浪周圍數
百里經流數千里而滌瀆滄溟之勢成語其細則
織波斷流縷分數十道泛溢數十區而滌洄泮渙
之形著是不惟資以利用抑且劃為地險襟帶絕
徼古而然矣哉

聖朝德威遠被蒲海風清爰據星軺所經尋波別派知
昔人所謂蔥嶺以東水皆東流蔥嶺以西水皆西流
者大率緣山而發就下而趨瀉為長河瀦為巨浸
而審其經絡要皆各有所歸耳竊惟漢桑欽作水
經承二百四十四家之紀載其書汗漫未易殫詳
然其首著黃河出蔥嶺于闐分南北河經疏勒莎
車諸國而東者証以今時形勢則較然符合為之
疏通貫注備悉指歸復叅以他書之說庶幾經緯

非誣而源流可証由是判張騫不根之論擴都實
拘墟之詞紀之以藪浸而國辨居行疏之以渠塘
而人兼耕牧即我

國家清晏之隆所以暨訖於無外者不由茲可見哉
志水第七

欽定四庫全書

欽定皇輿西域圖志卷二十四目錄

水一

安西南路

白楊河

惠回堡河

火燒溝

赤金湖

石油河

蘇賴河

昌馬河

布魯湖

十道溝

窟窿河

南籍端水

黑水河

宮阜河

藥水泉

茨窩泉

東長流水

烏拉大泉

蘆岡泉

月牙泉

鹽池

懸泉

黨河

渥洼水

哈喇淖爾

巴顏布拉克

龍勒水

色爾騰海

噶斯淖爾

安西北路

半池泉

西長流水

賽巴什湖

南湖

柳樹泉

鞭桿泉

必柳布拉克

巴克塔什布拉克

哈里勒齊馬克布拉克

阿納爾布拉克

哈套布拉克

烏拉台布拉克

喀什馬克布拉克

察罕喀什馬克布拉克

和賴布拉克

塔勒納沁郭勒

納林烏里雅蘇台布拉克

和洛魯克布拉克

哈喇垓圖布拉克

塔里雅圖布拉克

納林布拉克

庫克雅爾布拉克

薩勒奇台布拉克

博羅布爾噶蘇布拉克

巴爾庫勒淖爾

圖爾庫勒

托來布拉克

哈畢爾噶布拉克

烏爾圖布拉克

阿拉克椿濟郭勒

哈喇烏蘇

和尼烏蘇

欽定皇輿西域圖志卷二十四目錄

欽定四庫全書

欽定皇輿西域圖志卷二十四

水一

安西南路

白楊河

白楊河在玉門縣惠回堡南六十里南山中河有二源東南流二十五里合流十餘里當孔道折而西南流四十里名哈兆河

惠回堡河

惠回堡河源出惠回堡北山中西南行四十餘里至惠回堡北分東西流夾堡而趨各南流三十餘里入於地

火燒溝

火燒溝在驕馬城西三里南流二十餘里入於地

赤金湖

赤金湖在驕馬城西三十七里源在玉門縣南草

地有數派合流三十五里由縣西南境北行逕赤
金峽醜為三渠北流各三十里許至縣西北境復
合流而西又一支流自縣西南境分流逕縣南東
行三十餘里折而北醜為二源北流各三十里許
過縣東境復合流而西與西三渠合流之水合復
折而東北流三十里統名赤金湖入于阿拉克池
亦名花海子其隸縣西境最西一渠名西沙河

寰宇記 玉門縣有衆泉北流入延興海

〔一統志〕西凡馬河在赤金所西原出所南草地有數派會流而北又折東北三百里注於阿拉克池又哈濟爾河在所東上流亦有數派北流折東北亦注於阿拉克池池周數十里

按玉門縣地兼漢時會水池頭兩縣關駟注云衆水所會故曰會水今赤金湖由玉門縣南分五渠環縣城北行曲折入北山中其下流地名花海子以形勢求之應即漢書注所謂衆水所

會寰宇記所云衆泉北流者又考一統志載西
几馬河在赤金所西哈濟爾河在所東源有數
派北河合注河拉克他蒙古語謂花為阿拉克
是今花海子即阿拉克池亦即寰宇記之延興
海也

石油河

石油河在玉門縣南九十里南山中東南流三十
里西有龍王廟

劉昭郡國志延壽縣南有山石出泉注地為溝其

水肥如煮肉泊

肉汁也

凝膏然之極明不可食謂之

石漆

元和志石脂水在玉門縣東南一百八十里泉中有

苔如肥肉然之極明水上有黑脂人以草蓋取用

塗鴟夷酒囊及膏車周武帝宣政中突厥圍酒泉

取此脂然火焚其攻具得水愈明酒泉賴以獲濟

明一統志石油出肅州南山

按石脂水在玉門縣東南與今石油河方位適
合且石漆石脂石油義本相同其為然膏舊迹
無可疑者

蘇賴河

蘇賴河源在玉門縣靖遠城東南三百二十里出
南山中西北流百餘里昌馬河東北入之合流二
十餘里出南山口分兩大支其東北一支行七十
里折而北又分二支北流六十里出塔兒灣堡之

西北境河流漸細其西北一支直趨三四道溝合
流入布魯湖又南會十道溝水又南會窟窿河又
西經安西州治北三十里為南籍端水又西經敦
煌縣治西北二百里南會黨河又西流三十里入
哈喇淖爾初兩河合流出山西北一支東流三十
里分為靖逆東西二渠不通布魯湖而溉田甚廣
乾隆四年接引西渠餘水折北而西仍入布魯湖
於是蘇賴昌馬兩河下流分而復合經流一州二

縣之地土田悉資灌溉水利倍饒

按蘇賴與昌馬合流而蘇賴之名較著尋其源委則自濫觴南山歸墟黑海皆可以蘇賴名之矣第如十道溝窟隆河黨河自南來會同流異源者又當別為一河即以蘇賴經流全體而論在柳溝衛城東北者古稱布魯湖在安西州城北者古稱南籍端水雖以古証今其名或著或否而審定形勢則較然不誣允宜隨地立名以

資考証今舉全河經流形勢於此而因地著名之蹟仍分著於後焉

昌馬河

昌馬河源在靖逆城西南一百五十里南山下東北流百里與蘇賴河合流二十里出山餘詳見蘇賴河條下

布魯湖

布魯湖在柳溝城東北一百二十里即蘇賴昌馬

兩河下流經流渟滯之處澄波千頃葭葦彌望浴
鳧飛鷺宛然澤國由是西行踰柳溝城為古南籍
端水

十道溝

十道溝在玉門縣安西州交界二道溝以東屬玉
門縣三道溝以西屬安西州草地湧泉北流入於
布魯湖其第三四道溝南承昌馬河上流夾柳溝
堡城而北注所謂柳溝即第四道溝舊多檉柳故

名也隸玉門縣者一道溝東距縣城一百五十里
二道溝東距縣城一百六十里隸安西州者三道
溝西距州城二百五十里四道溝西距州城二百
三十里五道溝西距州城二百二十里六道溝西
距州城二百十五里七道溝西距州城二百十里
八道溝西距州城二百里九道溝西距州城一百
七十里十道溝西距州城一百六十二里

按漢書淵泉縣注闡駟云地多泉水蓋即指此

窟窿河

窟窿河在安西州雙塔堡東西距州城一百三十里東西分流經雙塔堡東入蘇賴河內多窟穴上小下大深邃不測盤渦湍急流不及遠南為土葫蘆溝即窟窿河發源處也

明史西域傳成化九年都督哈森舊作罕慎今改正及齊勤

舊作赤斤今改正罕東諸部集兵進討土爾番兵至布隆吉

爾舊作布隆吉今改正川

按柳溝衛城地名布隆吉亦稱布隆吉城蜜隆
河居其西亦稱布隆吉河明史布隆吉爾川即
謂此水也

南籍端水

南籍端水在安西州治北上承布魯湖西出之水
經流安西州全境亦蘇賴昌馬兩河下流也又西
行會南岸河渠三道西南流西距州城六十里曰
屯田渠長九十里繞州城南西注瓜州五堡間又

東踰小灣堡五里曰回民渠長六十里經瓜州五
堡南又東二十里曰餘丁渠長三十五里自南籍
端水西行會黨河入哈喇淖爾

漢書地理志冥安縣南籍端水出南羌中西北入
其澤

元和志晉昌縣冥水自吐谷渾界流入大澤東西
二百六十里南北六十里

按蘇賴昌馬二河舊經五衛故地在今安西州

北者槩謂之蘇賴河顧考今安西州舊為淵泉縣即漢冥安縣唐晉昌縣地則此州北經流之水為漢之南籍端水唐之冥水無疑漢書云出南羌西北入澤元和志云自吐谷渾界流入大澤皆舉其全體而言之耳

黑水河

黑水河在安西州東南九十里水色微黑有魚發源迤東之沙窩西流入蘆水溝河上有橋名黑水

橋厥名頗著

官阜河

官阜河在安西州踏實堡南二十里南山下有三道南通金鷄嶺西南有毛兔泉北距州城一百七里又西南有蛇窩泉北距州城一百三十里

藥水泉

藥水泉在石包城東泉有二源北流合一又北流為水峽又州治東南一百四十里有大泉南三百

五十里有塔兒泉

漢書地理志酒泉郡注應劭曰其水若酒故曰酒泉也師古曰舊俗傳云城下有金泉泉味如酒

按一統志載藥泉在沙川衛東南石堡城味畧如酒相傳飲之愈疾疑藥泉即漢書酒泉金泉之舊

茨窩泉

茨窩泉在安西州城北五百里

東長流水

東長流水在茨窩泉西北五十里東南距州城一百里

烏拉大泉

烏拉大泉在安西州青山子北七十里東南距州城七百二十里

蘆岡泉

蘆岡泉在烏拉大泉西北九十里東南距州城八

百十里接哈密界

魏書高昌傳高昌王馬儒求內徙割伊吾五百里以儒居之至羊榛水

按伊吾為今哈密自伊吾五百里至羊榛水宜在今哈密東南五百里之地今蘆岡泉西北去哈密約五百里疑與古羊榛水為近

月牙泉

月牙泉在敦煌縣南鳴沙山麓南隣黨河淵渟澄

澈映月無塵環以流沙雖遇烈風而泉不為沙掩
舊傳水產鐵背魚七星草服之可長生

肅州新志月牙泉人亦呼為藥泉

按肅州新志載月牙泉人亦呼為藥泉今月牙
泉在敦煌縣南藥泉在安西州東南一統志亦
二泉分載而肅州志謂月牙泉亦名藥泉者以
其產有七星草故並得是名歟又考今敦煌縣
城東北一百四十里百濟堡南有小湖北近坡

陀圓可周數里同名月牙蓋緣蹟地山泉濬發
所在多有不同源而名號偶符亦無可疑者

鹽池

鹽池在敦煌縣東四十七里池中鹽常自生百姓
仰給又黨河西四十里有西鹽池四面皆沙山

懸泉

懸泉即今水硤在敦煌縣東一百三十里

敦煌耆舊記水有懸泉之神

元和志懸泉水在沙州東北一百三十里出懸泉山漢將李廣伐大宛還士卒渴乏引佩刀刺山泉飛湧出

按懸泉之名于古最著今敦煌即沙洲故城

詳見

體則自圪塔井空心墩南境之山在敦煌縣直

東迤北境上者應即懸泉山山中水硤應即懸泉為漢李廣刺山湧泉故處也

黨河

黨河在敦煌縣城西七十里源出縣東南山中北流二百餘里又西流百餘里東北會龍勒水又北流出山為黨河口又北流至敦煌縣城西又北流百餘里入蘇賴河西入哈喇淖爾東分二大渠曰永豐渠長三十二里經縣城南折而東曰大有渠長四十二里經縣城北西分三大渠曰通裕渠長二十里曰慶裕渠長十七里曰普利渠長二十三里其下流東岸復分四小渠曰窰溝渠曰伏羌舊

渠曰伏羌新渠曰莊浪渠溉田甚廣即古氏置水也一名都鄉河其合流入喇喇淖爾處名葫蘆河漢書地理志敦煌郡龍勒縣氏置水出南羌中東北入澤溉民田

五代高居誨使于闐記瓜州南十里鳴沙山西渡都鄉河至陽關

按敦煌縣西境即漢龍勒縣地今敦煌縣境內之水無大於黨河者其為漢氏置水無疑也黨

河出南山入哈喇淖爾即漢書出南羌東北入澤之遺蹟其旁水分渠水利廣饒所謂溉民田者也鳴沙山在今敦煌縣東黨河在其西南北流則高居誨自鳴沙山西渡之都鄉河亦非此莫屬也惟黨河出山至河口皆西北流至敦煌縣西則北入哈喇淖爾而漢書乃云東北入澤似未全合然考漢龍勒故城在今黨河之西河流經其東則漢書所謂東北入者據其經流龍

勒縣境者而言謂在縣境之東而北入大澤耳
非謂全水形勢皆如是也唐岑參首蓓峰寄家
人詩云葫蘆河上淚沾巾首蓓峰為今五峰之
一葫蘆河與之相近今黨河下流哈喇淖爾一
帶濱河之地名呼魯蘇台河蓋以地而得名者
以葫蘆目之乃音轉之訛耳

渥洼水

渥洼水在敦煌縣界生天馬

漢書武帝紀元鼎四年秋馬生渥洼中作天馬之
歌注李斐曰南陽新野有暴利長當武帝時遭刑
屯田敦煌界數於此水旁見郡野馬中有奇異者
與凡馬來飲此水利長先作土人持勒鞞於水旁
後馬玩習久之代土人持勒鞞收得其馬獻之欲
神異此馬云從水中出

按渥洼水遺跡無可考李注稱暴利長以屯田
得之宜在敦煌境內水草耕牧之地今黨河分

五大渠溉田甚廣黨城為效穀故縣以勤效得穀其為當時屯種畜牧之地無可疑者則渥洼水或即氏置之支流與今黨河相附近者與

哈喇淖爾

哈喇淖爾

淖爾蒙古語謂池也餘倣此

在敦煌縣西北距縣城

二百八十里左右週遭小渚六七有三大源曰蘇

賴河曰昌馬河曰黨河皆出南羌中歸墟於是蘇賴河水自靖逆城東南三百里出山北流至柳溝

堡折而西南流會十道溝水繞安西州北過敦煌
縣西北入於淖爾昌馬河水自靖逆城南二百二
十一里東北入蘇賴河同入於淖爾黨河水自安
西州南四百里出山西北流過黨河口至敦煌縣西北
為呼嚕蘇郭勒會蘇賴河同入淖爾三河大槩分
東西二支經流一州二縣包絡羣山內資灌溉外
控形勢支流成渠旁水咸彙過此以西則地多沙
磧矣

按漢書南籍端水氏置水皆西北入澤所謂澤者即指哈喇淖爾而言淖爾當安西州之西北境諸水東南入之形勢方位適合也

巴顏布拉克

巴顏布拉克

布拉克蒙古語謂泉也餘倣此

在敦煌縣城西南八

十里東傍紅山又西五十里有多布溝山中出泉
南北環流當孔道

龍勒水

欽定四庫全書

欽定皇輿西域圖志

卷二十一

十一

龍勒水在敦煌縣古城南一百八十里龍勒山下
其水南流會黨河入於哈喇淖爾

元和志壽昌縣有龍勒水在縣南一百八十里龍
勒山下

按古城為龍勒故城

說見卷七疆域

則古城南境之水

當為龍勒水也又水出山而南流亦與元和志
水出龍勒山之說合

以上屬安西州

色爾騰海

色爾騰海在敦煌縣西南境外三百餘里水出南山之陰西北流潞為大澤四周有山圍繞水不長流西八十里別有圓澤名小色爾騰海西南三百里有鹽池

按唐書地理志載鹽池之名不一其在安西州西境外者有納職縣南六十里之陸鹽池今流沙以西古鄯善國地在唐為納職縣與所謂陸鹽池方位相合疑足當之然按蒲昌海一名鹽

澤漢書謂其潛行地中水經注謂其地廣千里
皆為鹽而剛堅掘發其下有大鹽如巨桃亦當
納職之境則唐書所稱陸鹽池者又應指此而
非色爾騰海西南之鹽池也

噶斯淖爾

噶斯淖爾在小色爾騰海西七百里其澤周迴二
百里支流三道西南行百餘里北二百里至羅布
淖爾

唐書地理志自納職縣西經獨泉東華西華駝泉渡茨其水過神泉三百九十里有羅護守捉

按兩色爾騰海鹽池噶斯淖爾諸水皆在敦煌縣西古玉門關外即唐以鄯善故城置之納職縣地所謂獨泉東華西華駝泉茨其水神泉者疑是其遺蹟也

以上屬安西州西境外地

安西北路

半池泉

半池泉在安西州北蘆岡泉西北七十里西距哈密城六百三十里

西長流水

西長流水在格子烟墩西北七十里西北距哈密城一百三十里源出天山南麓西南流入於沙磧

明一統志

輝和爾

舊作畏吾
免今改正

河在哈密城東一百

三十餘里沿河沙柳蒹葭

按輝和爾河與今西長流水距哈密里數相合
疑為一水與哈密城東鞭桿必柳諸河同屬山
泉之分支而西長流水經流較遠且甯道又明
一統志載娘子泉在輝和爾河東土人呼為哈
屯舊作可敦
今改正布拉克今無考附見於此

賽巴什湖

賽巴什湖在哈密城東北二十里湖分三渠曰大
榆樹溝曰小榆樹溝曰廟兒溝雍正十二年開濬

渠成西流入於南湖上建老閘駕鴛閘以時蓄洩
小榆樹溝老閘洩水半溉鴛鴦閘地畝半由北渠
迴流以溉東渠地畝廟兒溝老閘洩水以溉一百
顆樹地畝餘水由西老閘宣洩以溉鴛鴦閘地畝
秋後山泉稀少復治盤道以大榆樹溝水改入盤
道用溉秋田冬至後聚冰灘數十處以資春種有

屯田

詳見
屯政

南湖

南湖在哈密城南二十里賽巴什湖東來入之又
滙南山口以西諸泉折而西流二百里為沙磧所
限

元和志伊州東北四澗水並南流至州南十八里
合流為一水側近皆有良田

按元和志不載四澗水名而云在伊州東北與
今賽巴什湖方位相符則賽巴什湖之三渠當
即四澗舊地其南流至州南而合者即今賽巴

什湖之入于南湖者也又按一統志載哈密東門外有黑水河土名喀喇烏蘇敦煌隨筆載哈密城外東有闐干水西有蘇巴什湖夾流十餘里滙於南湖以今形勢考之則闐干水當即黑水河與所謂蘇巴什湖皆賽巴什湖之支流環城而會於南湖者非賽巴什湖之外別有蘇巴什湖亦非賽巴什湖分流達於南湖之外別有闐干黑水諸河也

柳樹泉

柳樹泉在哈密城南六十里其西境傍近南湖水

革豐綉

鞭桿泉

鞭桿泉在南山口東四十里源出塔什達巴南麓

西南流會必柳泉入賽巴什湖

必柳布拉克

必柳布拉克在鞭桿河東三十里出必柳達巴南

麓西南流會鞭桿泉入賽巴什湖

按布拉克蒙古語即泉也志中凡以漢語名者係以泉如柳樹鞭桿之屬以蒙古語名者係以布拉克如必柳巴克塔什之屬庶各以類從稱名較順云

巴克塔什布拉克

巴克塔什布拉克在南山口東一百里源出天山

南麓南流入沙磧

哈里勒齊馬克布拉克

哈里勒齊馬克布拉克在巴克塔什布拉克東二
十里源出天山南麓南流入沙磧

恩納爾布拉克

恩納爾布拉克在哈里勒齊馬克布拉克東十里
源出天山南麓南流入沙磧

哈套布拉克

哈套布拉克在恩納爾布拉克東十五里源出天

山南麓南流入沙磧

烏拉台布拉克

烏拉台布拉克在哈套布拉克東十里源出天山南麓南流入沙磧

哈什馬克布拉克

哈什馬克布拉克在烏拉台布拉克東十五里源出天山南麓南流入沙磧

察罕哈什馬克布拉克

察罕哈什馬克布拉克在哈什馬克布拉克東二
十里源出天山南麓南流入沙磧

和賴布賴克

和賴布拉克在察罕哈什馬克布拉克東五里源
出天山南麓南流入塔勒納沁河

按自鞭桿河至此泉皆南流滲入沙土山南之
地資其灌溉水利頗饒

塔勒納沁郭勒

塔勒納沁郭勒

郭勒蒙古語謂河也條故此

在塔勒納沁鄂拉南

北麓分流出山其南流分兩源經二十里合而西南行當格子烟墩之北其北流出山亦分兩源東流界塔勒納沁德都摩埃之間行十五里而伏西流為長渠百里至哈喇和屯

元和志柳谷水有東西二源出柔遠縣東北天山南流十五里乃合

按自今哈密東南境至此皆唐柔遠縣地塔勒

納沁郭勒當其東北境出天山分源合流形勢
猶存應屬唐時柳谷水也一統志載那清河在
哈密城東三百里許那清與納沁音本相同當
即指塔勒納沁郭勒而言曰在哈密城東者河
出天山麓南流數十里正當哈密東境也

納林烏里雅蘇台布拉克

納林烏里雅蘇台布拉克在南山口西三十六里

源出天山南麓

和洛魯克布拉克

和洛魯克布拉克在納林烏里雅蘇台布拉克西

二十四里源出天山南麓

哈喇孩圖布拉克

哈喇孩圖布拉克在和洛魯克布拉克西二十里

源出天山南麓

塔里雅圖布拉克

塔里雅圖布拉克在哈喇勒圖布拉克西十里源

出天山南麓

納林布拉克

納林布拉克在塔里雅圖布拉克西二十里源出

天山南麓

庫克雅爾布拉克

庫克雅爾布拉克在納林布拉克西十五里源出

天山南麓

薩勒奇台布拉克

薩拉布台布拉克在庫克雅爾布拉克西二十五里源出天山南麓

博羅布爾噶蘇布拉克

博羅布爾噶蘇布拉克在薩勒奇台布拉克西二十里源出天山南麓

按自納林烏里雅蘇台布拉克至博羅布爾噶蘇布拉克皆南流入於南湖西又有沙泉鴨子梯子諸泉咸入之沮如漫潤居五堡之陰回民

賴以耕種土田沃衍園林蔭蔚為西陸膏壤山川自然之美利具焉由是西南則間多沙磧矣

以上屬哈密

巴爾庫勒淖爾

巴爾庫勒淖爾舊音巴里坤淖爾在鎮西府

即巴爾庫

勒城西北十五里周一百二十餘里源出天山北

麓西北流百餘里滙為巨浸南至獨山子十五里

西至度濟三十里北抵北山下繞海多良田古蒲

類海也

後漢書竇固傳至天山擊呼衍王呼衍王走追至

蒲類海班超傳超為假司馬將兵別擊伊吾戰於

蒲類海注蒲類匈奴中海名在敦煌北西域傳桓

帝元嘉元年呼衍王將三十餘騎寇伊吾伊吾司

馬毛愷遣吏兵五百人於蒲類海東與呼衍王戰

悉為所沒呼衍王遂攻伊吾屯城

魏書高車傳彌俄突與蠕蠕主伏圖戰於蒲類海

北為伏圖所敗西走三百餘里伏圖次于伊吾北山
先是高昌王麴嘉求內徙世宗遣孟威迎之至伊吾
蠕蠕遁走彌俄突追擊大破之殺伏圖於蒲類海北

按古蒲類海當以蒲類國得名舊為匈奴東蒲類

王茲力支地後茲力支西徙於烏貪訾離

詳見卷九疆域

而

國有新境之可移海無故地之能徙故其名不易
也據後漢書注海在敦煌北魏書伏圖次伊吾
北山殺於蒲類海北是蒲類海固居敦煌直

北境上而近在伊吾山北者也今哈密以北
附近天山之水可當海名者有圖爾庫勒巴
爾庫勒淖爾而巴爾庫勒淖爾為大以形勢
求之其為古蒲類海也益信

圖爾庫勒

圖爾庫勒

庫勒回語即蒙古語
淖爾謂池也餘倣此

在巴爾庫勒城東三

百里其澤周迴五十里源出天山北麓西北流五
十里潴為大澤當鹽池之南

元和志鹽池海在伊吾縣南三百里周迴百餘里
唐書地理志伊吾縣南二里有鹽池海

按今哈密南並無大澤足當海之名者惟北有

圖爾庫勒及巴爾庫勒淖爾各周數十里而圖

爾庫勒北數里地名圖斯庫勒

圖斯回語謂鹽也

則唐

所謂鹽池海應即今圖爾庫勒也史曰縣南者

當日伊州州城尚在其北耳

又按宋王延德高昌行紀載自夏州至伊州中

歷格囉美源西方百川所會極望無際鷗鷺鳧
雁之類甚衆宋伊州即今哈密則格囉美源當
與哈密為近且以延德行紀前後程途審之疑
當時先過天山而北次復折而南行者所謂格囉
美源或即哈密以北之巴爾庫勒淖爾圖爾庫
勒之屬未可知也

托來布拉克

托來布拉克在托來達巴西二十里東距鎮西府

城一百八十里

哈畢爾噶布拉克

哈畢爾噶布拉克在度濟西六十里東南距巴爾庫勒城一百六十里

烏爾圖布拉克

烏爾圖布拉克在哈畢爾噶布拉克西九十里東南距巴爾庫勒城二百五十里

阿拉克椿濟郭勒

阿拉克椿濟郭勒在巴爾庫勒城西北阿達爾干

鄂拉東

哈喇烏蘇

哈喇烏蘇

烏蘇蒙古語謂水也餘做此

在阿拉克椿濟郭勒東

三十里


和尼烏蘇

和尼烏蘇在哈喇烏蘇東北

按巴爾庫勒北山之北地俱沙磧水泉隨處間

出或冬夏盈涸不常難以備載今舉其最著者
三水於此

以上屬鎮西府



欽定皇輿西域圖志卷二十四